

Script of Evening Gojri News Bulletin 09 August 2024 at 1700 Hrs

ایونٹنگ گو جری نیوز بلیٹن مورخہ 09 اگست 2024

یوہ آکا شوانی جموں ہے محبوب سلطانی تے ظفر اقبال تیں خبر سٹو۔ پہلاں خاص خاص خبر۔

- * 1۔ بھارتی اعلیٰ چناؤ کمشنر راجیو کمار نے کہیو ہے جے چناؤ کمیشن جموں کشمیر مانہ اسمبلی انتخابات تاولاں تیں تاولاں کران بارے وعدہ بند ہے۔ اس سلسلہ مانہ چناؤ کمیشن غی ٹیمنے ات غا چیف سیکریٹری تے پولیس سربراہ سنگ گل بات کی ہے۔
- * 2۔ صدر جمہوریہ درویدی مرمو نے کہیو ہے جے بھارت دُنیا مانہ متحرک جمہوریت غی اک مثال ہے تے جلد ہی بھارت دُنیا غی تیجی بڑی معیشت آلو ملک وی بنے گو۔
- * 3۔ وزیر اعظم نریندر مودی نے ملک غا لوکاں نانہ کہیو ہے جے وے ”ہر کھر ترنگا“ مہم نانہ اک یادگار تحریک بناویں۔
- * 4۔ تے مرکزی سرکار نے بھارت بنگلہ دیش سرحد ور موجودہ حالات نانہ دیکھتاں واں اک کمیٹی تشکیل دتی ہے۔

خبریں غی تفصیل نال پہلاں ظفر اقبال۔

CEC Election JK

بھارت غا اعلیٰ چناؤ کمشنر راجیو کمار نے کہیو ہے جے چناؤ کمیشن جموں کشمیر مانہ تولاں تیں تولاں اسمبلی انتخابات کران غی وعدہ بند ہے۔ جناب کمار نے کہیو ہے جموں کشمیر غی تمام سیاسی جماعت وی اسمبلی انتخابات کران بارے وکالت کر رہی ہیں۔ واضح رہے جے چناؤ کمیشن غو اک وفد جناب کمار غی قیادت مانہ اپنا 3 روزہ دورہ ور جموں کشمیر مانہ ہے۔ اس دورہ غو مقصد انتظامیہ تے حفاظتی ایجنسیاں غی طرفوں انتخابات کرایا جان بارے تیاریاں گو جائزو لینو ہے۔ سرکاری ذرائع غے مطابق اعلیٰ چناؤ کمیشن غی قیادت مانہ وفد نے اپنا دورہ غے دو جے تہاڑے جموں کشمیر غا چیف سیکریٹری اتل ڈلو تے یوٹی پولیس غا سربراہ آر آر سوین سنگ ملاقات کی ہے۔ واضح رہے جے سال 2014 توں بعد جموں کشمیر مانہ اسمبلی انتخابات نہیں کرایا گیا ہیں تاہم اگست 2019 مانہ ریاست نانہ 2 مرکزی زیر انتظام علاقان مانہ تقسیم کرن توں بعد بکھ بکھ وجوہات بشمول حد بندی کمیشن غی طرفوں کیو جا رہیو کم کاج شامل ہے۔ اس سلسلہ مانہ دسمبر 2023 مانہ عدالت عظمیٰ نے اپنو فیصلو سناتاں واں مرکز نانہ ہدایت دتی تھی جے وا ستمبر 2024 توں پہلاں جموں کشمیر مانہ چناؤ نانہ یقینی بناوے۔

Prez Diaspora

صدر جمہوریہ درویدی مرمو نے اج نیوزی لینڈ غا شہر آکلینڈ مانہ رہ رہیا بھارتی لوکاں سنگ اک تقریب غے دوران خطاب کیو ہے۔ اس تقریب مانہ بھارتی سرکار مانہ وزیر مملکت جارج کیورن تے پارلیمانی ممبر جگل کشور شرما، سومیترا خان اور نیوزی لینڈ مانہ بھارتی ہائی کمشنر نیتا بھوشن تیں علاوہ بڑی تعداد مانہ ات رہ رہیا بھارتی لوکاں نے شرکت کی ہے۔ اس موقعہ ور انہاں نے اپنا خطاب مانہ کہیو ہے جے بھارت متحرک جمہوریت غی اک مثال ہے تے جلد دُنیا غی تیجی بڑی معیشت آلو ملک بنن جا رہیو ہے۔ اُن

غو مزید کہنو تھو جے نیوزی لینڈ نے اپنی مہارت تے تجربہ سنگ بھارت غی ترقی تے خصوصی طور ور تعلیمی شعبہ مانہہ اپنی خدمات دتی ہیں۔ محترمہ مرمو نے بھارتی تہوار بشمول دیوالی، ہولی تے آرم نانہہ نیوزی لینڈ مانہہ جوش و خروش سنگ منان ور خوشی غو اظہار کیو۔ اس ضمن مانہہ انہاں نے ات رہ رہیا بھارتی شہریاں غی سراہنا کی جنہاں نے بھارتی تہوار تے روایتی چیزاں نانہہ برقرار رکھیو ہے۔

LS Landing Bill

لوک سبھا مانہہ اج لینڈنگ بل 2024 پیش کیو گیو ہے۔ اس بل نانہہ جہازاں، بندرگاہاں تے پانی آلا رستاں غا وزیر سرپانڈ سونوال نے لوک سبھا مانہہ پیش کیو ہے۔ اس بل غے ذریعے سامان لین دین بارے قانون رکھیا گیا ہیں تے مرکزی سرکار نانہہ ہدایت دین بارے اختیار بنایو گیو ہے۔ قابل ذکر ہے جے اس بل نانہہ متعارف کراغے انڈین بل آف لینڈنگ ایکٹ 1856 نانہہ ختم کر دتو ہے۔ یا د رہ جے پارلیمنٹ غا دوہاں ایواناں غی کاروائی اج غیر معینہ مدت واسطے معطل ہو گئی ہے۔

LS Ralways Bill

لوک سبھا مانہہ اج ریلوے ترمیمی بل 2024 پیش کیو گیو۔ اس ترمیمی بل نانہہ ریلوے گا وزیر اشنو ویشنو نے لوک سبھا مانہہ پیش کیو۔ قابل ذکر ہے جے یوہ بل ریلوے قانون 1989 مانہہ ترمیم کرن بارے ہے۔ اس بل نانہہ متعارف کراتاں واں ریلوے غا وزیر نے کہیو جے یوہ بل ریلوے بورڈ نانہہ مزید مضبوط بنا غے اپنی قابلیت مانہہ مزید بابدو کرے گو۔ اس بل نانہہ متعارف کران توں بھارتی ریلو بورڈ قانون 1905 غا سارا قانونی اختیارات اس بل غے ذریعے ریلوے بورڈ قانون 1905 نانہہ ختم کر دتو جائے گو تے بورڈ قانون 1905 غا سارا قوانین 1989 مانہہ داخل کر دتا جا نیں گا۔

Jaishanker Russia

وزیر خارجہ ڈاکٹر ایس جے شنکر نے لوک سبھا مانہہ دسیو ہے جے روس غی فوج نے 91 بھارتی شہریاں نانہہ اپنی فوج مانہہ پھرتی کیو ہے۔ دسیو گیو ہے جے ان وچوں 8 نے جان گنوا دتی ہے، 14 رہا کر دتا گیا جد کہ 69 دوجا اجاں توڑی اپنی رہائی غو انتظار کر رہیا ہیں۔ وزیر خارجہ نے یقین دہانی کراتاں واں کہیو ہے جے بھارت اس مسئلہ نانہہ سنگین طریقہ سنگ دیکھ ریو ہے تے اس مسئلہ ور ملک غا وزیر اعظم نانہہ روس غا صدر ولاد میر پٹن نے یقین دہانی کرائی ہے جے بھارت غا ان شہریاں نانہہ جلد ہی روس توں رہا کیو جائے گو۔ وزیر خارجہ ایس جے شنکر نے دسیو ہے جے روس غو کہنو ہے جے بھارت گا یہ شہری اپنی رضامندی غے تحت اپنے آپ روس مانہہ داخل ہوا تھا تے ان مانہہ کجھ اک نانہہ روز گار غو جھانسو دتو گیو تھو۔ جناب شنکر نے سی بی آئی غی پوچھ تاچھ غا جرائم مانہہ ملوث ہون ور ان 19 شہریاں غے خلاف بوئی کاروائی ور وی جانکاری سانجھا کی۔ سانبر فراڈ غے ذریعے نقصان چان آلاں بارے جانکاری دیتاں واں جناب جے شنکر نے دسیو ہے جنوب مشرقی ایشیا توں سرکار نے سائبر فراڈ توں متاثر ہون آلا 650 شہریاں نانہہ کمبوڈیہ، 450 شہریاں نانہہ برما تے 548 شہریاں نانہہ لواس توں واپس آنیو ہے۔

EPSKN Samba

چیف زراعت افسر سانبہ مدن گوپال سنگھ نے یکم اگست توں 15 اگست توڑی جا ری ربن آلی ”ایک پیڑ ماں کے نام“ ”ایک پیڑ شہیدوں کے نام“ مہم غے تحت سرحد رام گڑھ تحصیل غا گران کلاح مانہ شہید دیپک کمار غی شہادت نانہہ یا دکرتاں واں اک بوٹو لا غے شہید دیپک کمار نانہہ خراج عقیدت پیش کیو۔ دیپک کمار نانہہ خراج عقیدت پیش کرن غی اس تقریب مانہہ دیپک کمار غو کنبو، سابقہ پنچ تے سرپنچ تے ات گا معزز شہری وی موجود تھا۔ بوٹا لان غی اس تقریب مانہہ محکمہ جنگلات غا عہدیدار وی موجود تھا۔ اس سلسلہ مانہہ گل کرتاں واں زراعت چیف سانبہ مدن گوپال نے اس طرح کہیو۔۔۔ بانٹ۔۔

یہ خبر تم آکاشوانی جموں تیں سن رہیا ہیں خبراں غا باقی حصہ نال محبوب سلطانی۔

PM Har Ghar Tiranga

وزیر اعظم نریندرمو دی نے اج لوکاں نانہہ کہیو ہے جے ویں ”ہر گھر ترنگا“ مہم نانہہ اک یا دگا رعوامی تحریک بناویں۔ اس ضمن مانہہ انہاں نے اپنا سماجی میڈیا غی اک ویب سائٹ ایکس ور اپنی تصویر نانہہ بدل غے قومی ترنگا غی تصویر چڑائی تے لوکاں نانہہ وی کہیو جے وے اپنا سماجی میڈیا ہنڈلز ور اپنی تصویر نانہہ بدل غے قومی ترنگا غی تصویر لا ویں۔ اس تیں علا وہ انہاں نے

harghartaringa.com

ور قومی ترنگا سنگ فوٹو بنا غے چاڑن با رے وی کہیو تے اس ضمن مانہہ لوکاں نانہہ مزید کہیو گیو ہے جے یوم آزادی غے پیش نظر اپنا کہراں غی چھتاں ور ترنگو لان با رے مہم نانہہ کامیاب بناویں۔

Bangladesh Border Committee

مرکزی سرکا ر نے بھارت بنگلہ دیش غی سرحد ور حالات نانہہ دیکھتاں واں اک کمیٹی تشکیل دتی ہے۔ جہیڑی جے بھارت بنگلہ دیش غی سرحدی حالات ور نگرانی رکھے گی۔ قابل ذکر ہے جے یاہ کمیٹی بنگلہ دیش مانہہ موجود دہارتی شہریاں تے ات غا اقلیتی طبقہ غی حفاظتی صورتحال ور نظر رکھے گی۔ اس کمیٹی غی قیادت بی ایس ایف غی مشرقی کمانڈ غا اے ڈی جی خود کر رہیا ہیں۔ کمیٹی مانہہ جنوبی بنگال غا بی ایس ایف ہیڈ کوارٹر غا آئی جی تریپو رہ بی ایس ایف غا ہیڈ کوارٹر آئی جی تے ایل پی اے آئی غا ممبر توں علا وہ ایل پی اے آئی غا سیکریٹری وی شامل ہیں۔

PM Quit India

وزیر اعظم نریندرمو دی نے مہاتمہ گاندھی غی قیادت مانہہ شروع کی گئی ”بھارت چھوڑو تحریک“ مانہہ شامل ہون آلاں نانہہ خراج عقیدت پیش کیو ہے۔ اک سماجی میڈیا پوسٹ مانہہ جناب مو دی نے ”بھارت چھوڑو تحریک“ نانہہ آزادی غی جدوجہد مانہہ اک اہم لمحو قرار دتو ہے۔ اس موقعہ ور اک ویڈیو پیغام غے ذریعے اپنا خیالات سانجھا کرتاں واں جناب مو دی نے اس گل نانہہ وی اُجاگر کیو جے برطانوی لوکاں توں آزادی مانہہ اس تحریک غو اہم کردار ہے۔ انہاں نے مزید کہیو جے ”بھارت چھوڑو تحریک“ غی وجہ توں اج مُلک، بد عنوانی، خاندانی سیاست توں پاک قوم غی وکالت کر رہیو ہے۔ اس تیں علا وہ جناب مو دی نے یوم آزادی غے پیش نظر اپنا سماجی میڈیا ہنڈلز ور اپنی تصویر نانہہ بدل غے ترنگا غی تصویر لائی ہے۔ اک پیغام مانہہ جناب مو دی نے لوکاں نانہہ ”ہر گھر ترنگا“ مہم نانہہ اک

با رہپھر توں یا دگا ر بنان با رے وی کہیو۔ تے اس ضمن مانہہ انہاں نے لوکاں نانہہ کہیو
جے وے ترنگا سنگ اپنی تصویر بنا غے ہر گھر ترنگا ویب سائٹ ور چاڑیں۔

LS Bullet Proof Jacket

ڈی آر ڈی او نے فرنٹ ہارڈ ارمر پینل غی طرز ور نوی بُلٹ پروف جیکٹ تیار کی ہیں۔ اس
گل غی جانکاری اج لوک سبھا مانہہ دفاع با رے وزیر مملکت سنجے سیٹھ دے رہیا تھا۔
وزیر مملکت نے جانکاری دیتاں واں دسیو جے نوی بُلٹ پروف جیکٹ لیول 6 ہے۔ جس غو
وزن کل 10 کلو ہے تے اس طرح یہ جیکٹ سب توں ہلکی ہیں۔ انہاں نے کہیو جے نویں
تکنیک نال یاہ جیکٹ بنانی گئی ہے۔

LS Delegation

بھارتی چیمبر آف کامرس غو اک وفد جس غی قیادت عمایا پرہو کر رہیا تھا نے اج راج
بھون سرینگر مانہہ لیفٹنٹ گورنر منوج سنہا سنگ ملاقات کی۔ جناب سنہا سنگ ملاقات کر
غے اس وفد نے جموں کشمیر مانہہ نواں سٹارٹ اپس شروع کرن تے اُن نانہہ بدھان با رے
وی گل کی۔

CS e Shram

چیف سیکریٹری اتل ڈلو نے پچھلے تہاڑے محنت کش تے روزگار محکمہ اور
خوراک، عوامی سپلائی صارفین امور با رے محکمہ غی سانجھا طور ور اک میٹنگ منعقد کر
گے ای شرم پورٹل غے ذریعے اندراج یا فتنہ مزدوراں نانہہ راشن کارڈ مہیا کرایا جان
بارے جانکاری حاصل کی۔ اس میٹنگ غے دوران چیف سیکریٹری نے عدالت عظمیٰ غی
طرفوں دتی گئی ہدایت ور زور پایو جس مانہہ تمام ریا ستاں تے مرکزی زیر انتظام علاقوں
نانہہ کہیو گیو تھو جے ای شرم پورٹل غے ذریعے اندراج یا فتنہ مزدور جنہاں نانہہ اجاں
راشن کارڈ فراہم نہیں کیا گیا انہاں نانہہ جلد راشن کارڈ فراہم کیا جائیں۔ اس ضمن مانہہ
جناب ڈلو نے متعلقہ ڈپٹی کمشنراں نانہہ کہیو جے وے بذات خود اس غی نگرانی کریں تے
دوئے محکماں گا افسراں غا تعاون نانہہ یقینی بناویں تانجے جلد توں جلد متعلقہ ضلع مانہہ
مطلوبہ نتائج نانہہ حاصل کیو جا سکے۔

اس غے نال ہی خبراں غو یوہ بلیٹن ختم ہوؤ۔